

國朝耆獻類徵初編卷百二十九目錄

詞臣十五

劉亨地

蔣士銓

吉夢蘭

蔣雍植

曹仁虎

余廷燦

王世芳

秦大成

褚廷璋

徐天柱

吳壽昌

王仲愚

秦泉

弟潮

恆裕

林澍蕃

孔廣森

吳俊升

龔大萬
羅廷彥

陳士雅

補錄

董潮

林澍蕃

入稿

國朝耆獻類徵初編卷百二十九

通奉大夫前署江西巡撫江西布政使司布政使湘陰李桓輯
詞臣十五

劉亨地

公諱亨地字載人寅橋其自號也公以乾隆丙子舉於鄉典試者
張吏部元禮余嫺家也丁丑成進士又與余從兄懋園同榜故余
識公爲最早然是時余初授館職意氣方盛與天下勝流相馳逐
座客恆滿文酒之會無虛夕公願恬淡自持不親余余亦未能知
公也旣聞公父梅垞先生得自謫籍歸故里實公孝思篤摯上感
九重余始心重公願納交而公乞假歸省矣丁亥余服闋赴京

公已官司業曹署各異不數數相見辛卯夏余自塞外蒙 賜環
再授館職公亦服闋來京師會有 詔蒐羅遺書以充四庫余與
公同司編纂之役乃晨夕聚一堂時館閣英俊畢與是選咸踔厲
風發挺然有以自見公獨落落穆穆手丹墨二毫終日無一語然
叩所學援古證今具有經緯勘所輯錄亦條理秩然是非不苟如
坐古人於旁而面爲商榷也余始慨然十餘年來猶淺之乎知公
矣旣而公以編纂受 主知以司業額缺僅一員需次無期 特
改補中允俄遷侍講充文淵閣校理丁酉受 命充廣東副考官
且駸駸嚮用而先一年夏公長子利鉦天利鉦性純篤又有雋才
人謂湘潭劉氏四翰林至利鉦當五故公悼之甚淚痕時霑漬衣

袖閒竟坐是眠食日損精神日耗廣東典試歸日遂卒於江西年
僅四十有四訃至京師同館咸相嗟惜惜其類西河之事也然三
代以上人恆患乎過情三代以下人恆患其不及情公惟天性深
摯故能孝於親篤於骨肉惟孝於親篤於骨肉故父子之間纏綿
悱惻一往而不能自裁公之恬聲利敦內行此亦一徵矣故責備
於賢者非篤論也且夫死生命也修短數也公適卒於哭子之餘
遂不得不以爲職是故耳顏子早夭不緣悲慘而漠視天屬泛泛
如萍水相值者亦何嘗盡毫耄哉公仲子利錕以余粗能知公者
奉狀乞銘義無可卻乃雪涕而銘曰

外樸而真中粹而溫其存也不疏不親其沒也乃慨想其人已矣

乎吾誰與論

右墓誌銘紀昀撰

蔣士銓

蔣士銓江西鉛山人家故貧四歲母鍾氏授書斷竹篴爲波磔點畫攢簇成字教之旣長工爲文喜吟詠翰林院修撰金德瑛督學江西奇其才拔冠弟子員乾隆十九年由舉人官內閣中書二十二年成進士改翰林院庶吉士二十五年散館授編修二十七年充順天鄉試同考官旋以病乞歸高宗純皇帝賜彭元瑞詩有江西兩名士句一謂元瑞一謂士銓士銓聞之感激恩眷力疾入都補官逾二年記名以御史用未幾仍以病乞休遂卒年六十一士銓志節凜凜以古賢者自厲趨人之急如恐不及其所爲詩氣體雄傑得之天授變化伸縮能拔奇於古人之外至敘述節

烈讀之使人感泣少時與武定汪軻南昌楊屋南豐趙由儀有四子之目著有忠雅堂文集十二卷詩集二十七卷銅絃詞二卷

右 國史館本傳

乾隆十九年余會試在京師以通家子得謁總憲金檣門先生時鉛山蔣君士銓先生門下士也以能詩鳴故詩酒之會無不共之迄今忽忽三十餘年其間離合無定而郢石之知罕有逾於君者自先生下世二十餘年君又繼之所謂臣之質死久矣於是其子知廉等以狀來乞爲幽龕之銘余其忍辭按狀君字心餘一字苕生號清容祖承榮父堅皆不仕君生四歲母鍾宜人授以四子書及唐人詩一過不忘清江楊勤愨公異之待以國士從父至山西

讀鳳臺王氏藏書學益富年二十二檜門先生督江西學政拔補
縣學生以孤鳳凰稱之十二年中丁卯科鄉試十九年考授內閣
中書舍人二十二年成進士改庶吉士時余亦 召試爲中書舍
人故與君之交益密二十五年授編修充武英殿纂修官二十七
年又偕余充順天鄉試同考官二十八年充續文獻通考館纂修
官明年奉母南歸居金陵久之浙江巡撫請主紹興蕺山書院凡
五載兩淮鹽運使復請主揚州安定講席奉母以行四十年鍾宜
人歿服終入京充國史館纂修官尋患風痺時淹臥牀第閒四十
四年余請假還 朝往候之君笑曰已作習鑿齒矣談笑閒目光
猶炯炯也四十六年復病歸南昌至五十年二月二十二日卒年

六十有一君生歿之日皆無雨而雷風故世以爲異云子七長知
廉拔貢生充四庫館膳錄官次知節舉人次知讓 召試 賜舉
人次知白知重知簡知約皆幼生平著藏園詩文集若干卷存於
家君風神散朗如魏晉閒人從容譙笑繼以諧謔而甄錄寒峻激
揚忠義有古烈士之風博通淹雅自古文辭及填詞度曲無所不
工而最擅場者莫如詩當其搖毫擲簡意緒觸發如雷奮地如風
挾土如熊咆虎嘯鯨呿鼉擲山負海涵莫可窮詰故論詩於當代
以君爲首而論君之詩以五七言古詩爲極則君與禮部尙書彭
君元瑞生同鄉成進士同年又同官翰林 上賜詩嘗有江右兩
名士之目今彭君置身華要而君官不過七品往蹇來反卒纏縣

於惡疾歐陽子曰士患不逢時時逢矣患人主之不知知矣而不用者命也如君洵可謂之命矣五十二年某月日知廉等葬君於某縣之某鄉乃作銘曰

維遇之膏繫才之豐匪惟才豐志行攸崇挾幽發潛扶孝植忠何登朝著疾疾乃叢有山崇崇有水淙淙曰歸斯邱馬鬣以封淩雲之氣闕於幽宮發爲詩歌翻蜨走虹如有不信驗此雷風

右墓誌銘王昶撰

心餘蔣君旣卒之明年其孤以狀來曰先大父母傳志皆先生撰今先君又亡將葬貞石之文知廉等敢循例以請亦先君志也嗚呼余前春過西江君已半體枯聞余至喜力疾懽飲臨別時手平

生事略見示余知其意泣而領之然私心自揣余忝廁詞館先君
七科後死之責當在君不在余卽在余亦未必銘君兩代而今竟
不然矣然則余之衰固可想見而古人之所謂死友者非君而何
謹按君姓蔣諱士銓號清容一字蒼生江西鉛山人父堅有奇節
獨行嘗遊澤州縛君馬背行千餘里甫四歲母鍾太宜人卽屈竹
絲作波磔教之認字君天稟英絕有覽輒記握筆如天馬怒馳超
塵絕迹丁卯舉於鄉甲戌考授中書丁丑成進士入翰林散館第
一授編修充武英殿纂修分校順天鄉試居官八年乞假養母僑
寓金陵大府聘爲戟山崇文安定三書院山長君意灑然有終焉
之志會少宰彭公元瑞召見天子問蔣某何在彭以渠母老

對及太宜人薨君感 上恩入都京察一等引 見以御史用旋

患風痺還南昌五年年六十一卒君秀眉長身兩眸子奕奕如電
諧謔風發聽者傾靡胸無單複不解囁嚅耳語遇不可於意雖權
貴幾微不能容太宜人慮其性剛勸令歸里及君再至長安浮沈
舊職一二知己盡矣同列皆闖然少年趨尙寡諧愈益不自喜遂
有輕死生一晝夜之意不自珍攝以致早衰然其胸中非一刻忘
世者在戴山時越中富家池三江閘日久堙廢君力請於大府借
帑辦治曰事雖非山長責然食越人粟則視越人如一家焉埽墓
鉛山爲邑人建壩濬渠以通水利修毋嶺塏以利文風建棚縣衙
便應試者請移駐巡檢於西鄉湖坊警不良者甲戌禮闈落第

上命九卿各保一人涂少司空將薦君君讓與孝廉某以其母老
也有駱生者負鹽課客死君連夜作十三札飛遞嶺南俾其孤孀
扶六櫬歸君平素無宿諾故其言於人也信初入京師才名籍甚
諸公卿震若麟鳳爭先窺觀表文達公在 上前薦君與彭公爲
江右兩名士以故 上屢問君 賜彭公詩並及君乃二十年來
彭公官至尙書而君倮然一老詞臣如故也雖其俄出俄入自緩
官階旁觀者不能無惜焉而要知命之所存君本無心進取且夫
孝者所以事君也古人一日之養三公不易君奉太宜人設教東
南有江山之勝板輿所臨海內捧杖擎觴而至者屢交戶外高麗
使臣餉墨四笏求君樂府歸聲聞之盛天爵之榮近今未有也晚

年雖病廢而神明不衰左手作字橫斜入古所居藏園水木明瑟
七子五孫穿花繞膝而侍死之夕無雲而雷者三相傳君生時亦
然嗚呼其來其去豈偶然哉君才高而心虛全集皆余商定偶獻
一規登時立改嘗至其家見公兩木主曰方伯彭公曰督學金公
蓋君少時受知最深者其敦師友之義死生不易如此所著古文
若干卷詩若干卷銅絃詞二卷填詞九種娶張氏 誥封宜人子
知廉拔貢生次知節知讓皆舉孝廉次知白知重知簡知約尙幼
女一人以某月某日葬銘曰

懸弧白日雷聲起天若告人生才子旣生不用故何以人再問天
天默矣振古文人多類此漢之崔蔡唐之李吁嗟蔣君毋乃是平

生著述千萬紙有如月照西江水萬古暉暉光不已勝我才華輸
我齒貪我作銘先我死我敢無言報知己古書黑石鐫蒿里兼備
他年補國史

右墓誌銘袁枚撰

蔣士銓字心餘一字苕生號清容其先爲錢氏自浙江長興遷江
西鉛山始姓蔣父堅有奇節士銓生四歲母鍾授以四子書及唐
人詩斷竹篴爲波磔點畫攢簇成字教之十一父縛之馬背遊太
行讀鳳臺王氏藏書冠而歸補縣學生學政以孤鳳皇稱之士銓
天稟英絕有覽輒記握筆如天馬怒馳超塵絕迹丁卯舉於鄉甲
戌考授中書丁丑成進士入翰林散館第一授編修居官八年乞